

Contribuziuns a differentas instituziuns

Concedì ils daners da cultura supplementars per l'onn 2014

■ **(cc) La regenza ha decidi co ch'ils daners da cultura supplementars, ch'il cussegl grond ha mess a disposiziun a chaschun da l'ultima sessiun da december per l'onn 2014, duain vegnir impundids.** Ils meds finansials supplementars da tut en tut in mez milliun francs, ch'èn vegnids concedids en il preventiv per l'onn 2014, vegnan repartids sco suonda:

Teater Cuir	120 000 francs
Filarmonia da chombra dal Grischun	86 000 francs
Archiv grischun per la cultura da las dunnas	24 000 francs
Fundaziun Nairs Scuol	30 000 francs
Origen Festival Cultural	200 000 francs
Opera Viva Sursaiassa	40 000 francs



L'Origen Festival Cultural da Giovanni Netzer survegn 200 000 francs.

MAD

Contribuziuns a differents orchester

La regenza ha attribuì a differents orchester las contribuziuns da 374 000 francs ch'eran vegnidas approvadas en il preventiv 2014. Per l'onn current survegn la Filarmonia da chombra 322 000 francs (fin ussa 250 000 francs), l'ensemble ö! 40 000 francs (fin ussa 30 000 francs) e l'orchester le phénix 12 000 francs (fin ussa nagina contribuziun). L'Orchestra della Svizzera italiana vegn sustegnì separadamain cun ina contribuziun annuala dad 80 000 francs or dals daners da la lottaria naziunala.

Klibühni, Cuir: A la Klibühni a Cuir vegn concedida ina garanzia da deficit da maximalmain 200 000 francs per il program d'occurrentas da l'onn 2014.

Uniun Arosa cultura: A l'uniun Arosa cultura vegn concedida ina garanzia da deficit da totalmain 70 000 francs per las

emnas da curs da musica e per la Music Academy che han lieu la stad/l'atun 2014.

Academia Engiadina SA: Per il project «Turissem da furmaziun – concept e svilup da purschidas novas» vegn garantida a l'Academia Engiadina SA cun sedia a Samedan ina contribuziun da totalmain 165 000 francs en il rom da la nova politica regiunala (NPR) (mintgamai per la mesadad a quint da la confederaziun e dal chantun). Il project cumpiglia in'extensiun considerabla da las purschidas en la furmaziun professiunala supplementara per persunas creschidas, cun las qualas cunzunt persunas d'ordaifer il chantun duain vegnir acquistadas sco visitadras e visitaders dals curs. La contribuziun da sustegn gida a cuvrir ils custs

da svilup e da concept sco er ad elavurar ed ad iniziar activitads da marketing resp. da vendita.

Telefericas Tavau Claustra SA: A las Telefericas Tavau Claustra SA vegn garantida ina contribuziun chantunala da 300 000 francs en il rom dal concept per implants da sport d'impurtanza naziunala (Cisin) per construir pistas da trenament e da cursa per skis alpin Jakobs-horn–Usser Isch Tavau. La confederaziun paja ina contribuziun da 700 000 francs. Tras ils implants dal Cisin duain vegnir creadas cunzunt per il cumenzament da l'enviern cundiziuns da trenament idealas per las atletas ed ils atlets da Swiss Ski, dal Center naziunal da trenament ost skis alpin e da la fundaziun Gimnasi svizzer da sport Tavau.